

– Ես գիտեմ...: Բայց դու լաւ ընկեր չես, Ֆարհատ, ամօ՛թ քեզ համար, – փոխեց նա իր խօսքը: – Քեզ հետ ժամադիր եղող աղջիկը այնքան շտապեց, որ թողեց «Կաթնաղբիւրի» մօտ իր սանդղը. բայց դու այնքան անշնորհք գտնուեցար, որ չկարողացար նկատել: Ա՛ն, քեզ եմ տալիս, տար, առաւօտեան իրան տո՛ւր, գլուխդ գովի՛ր, ասա՛, ես գտայ, թող երեսդ սպիտակի:

Այժմ ես հասկացայ, թէ ինչու էր Մարօն բարկացել իմ վրայ: Նա տոեց ինձ մի սանդղ. դա Սօնայի սանդղն էր, որ մոռացմամբ թողել էր «Կաթնաղբիւրի» մօտ լողանալու ժամանակ: Բայց որտեղի՞ց էր ընկել Մարօի ձեռքը:

– Ո՛վ տոեց քեզ այդ սանդղը, – հարցրի ես:

– Ես ինքս գտայ այնտեղ:

– Դու մեզ տեսա՞ր:

– Կոյր չէի: որ չտեսնէի:

– Բայց մենք ինչո՞ւ չտեսանք քեզ:

– Ես շատ անգամ դելի պէս աչքի չեմ երեւում, – պատասխանեց նա ծիծաղելով:

Մարօի խորամանկութիւնները ես վաղուց գիտէի. այդ պատճառով իսկոյն չկարողացայ հաւատալ նրան եւ ասեցի.

– Դու սուտ ես խօսում, այս սանդղը ուրիշ կերպով հասել է քո ձեռքը:

– Չե՞ս հաւատում ինձ, – պատասխանեց նա պինդ ծայնով: – Կուզե՞ս բոլորը կը պատմեմ. նա աղբիւրի մէջ լողանում էր. դու հեռուից ապուշի պէս նայում էիր. յանկարծ անցաւ ձորի միջով ճգնաւորը. նա երգում էր մի տխուր մեղեդի: Յետոյ յայտնուեցան Սուսանը եւ Զիւբբին, իսկ դուք բարձրացաք բլուրի վրայ, նստեցիք նշենիների թփերի մէջ: Թէ կուզես, կը պատմեմ դուք ինչ խօսեցիք:

– Զիմա հաւատում եմ:

Մարօն մտածութեան գնաց եւ թուրքական լռութիւնից յետոյ խօսեց.

– Խե՛ղճ Սօնա, որքա՛ն անբախտ է նա... իմ սիրտը չդիմացաւ, երբ նա այնպէս ցաւալի կերպով խօսում էր իր մօր մահոտան մասին եւ իր եղբոր կորստեան մասին: Իմ սիրտը չդիմացաւ, եւ ես թաքնած թփերի մէջ, լաց էի լինում, Ֆարհատ:

Վերջին խօսքերի միջոցին ես նկատեցի Մարօի աչքերում արտասուք:

– Դու հիմա էլ լաց ես լինում, – ասացի նրան: